

150 m para uso exclusivo por persoas con mobilidade reducida.

No tramo 1 do couto do Carballiño, a tempada de pesca finalizará o 30 de xuño.

-Río Arnoia.

No primeiro tramo do couto dos Medos, comprendido entre a ponte de Parada á Igrexa e a ponte da estrada Maceda-Vilar de Barrio, prohíbese o uso de engado natural durante toda a tempada hábil. No resto do couto, prohíbese a pesca de calquera especie utilizando como engado o *asticot*.

No couto de Celanova prohíbese a pesca de calquera especie utilizando como engado o *asticot*.

Autorízase durante todo o ano a pesca de ciprínidos no tramo comprendido entre a Presa de Acearrica (concello de Allariz) e a Presa do Buraco (concello de Allariz), nunha lonxitude aproximada de 0,7 km.

No couto de Allariz, a tempada de pesca finalizará o 31 de xullo.

O tramo do couto de Allariz, comprendido entre a Presa do Buraco e a presa da Fábrica de Curtidos dos Nogueiras, dunha lonxitude aproximada de 150 m, resérvase para actividades da aula da natureza. Para calquera outro fin, o tramo considerárase vedado.

-Río Limia.

No couto de Ponteliñares, a tempada de pesca finalizará o 31 de xullo. Neste mesmo couto, prohíbese a pesca de calquera especie utilizando como engado o *asticot*.

-Río Mao.

No tramo de pesca sen morte do couto de Montederramo, a tempada de pesca finalizará o 15 de agosto.

No encoro de Leboreiro (couto de Montederramo) permítese o uso de dúas canas ao parado.

-Río Miño.

Desde o remate da tempada hábil ata o 31 de outubro autorízase exclusivamente a pesca sen morte entre a presa de Velle (concello de Ourense) e a pasarela da illa de Maimón (Reza-concello de Ourense), nunha lonxitude aproximada de 5,6 km. A partir do 1 de novembro permítese a pesca de ciprínidos e *black-bass* ou perca negra desde a beira do río, no tramo comprendido entre o viaduto do ferrocarril (concello de Ourense) e Ponte do Ribeiriño ou Ponte Novísima (concello de Ourense), nunha lonxitude aproximada de 1,2 km.

-Río Sil.

Autorízase a pesca de ciprínidos e *black-bass* ou perca negra durante todo o ano no tramo comprendido entre a Ponte de San Fernando (concello do Barco de Valdeorras) e a depuradora (concello do Barco de Valdeorras), nunha lonxitude aproximada de 2,5 km.

-Río Viñao.

No couto de Boborás prohíbese o uso do *asticot* como engado para todas as especies.

Réximes especiais da provincia de Pontevedra.

-Río Pontañas ou de Cabirtas (afluente do Deza).

Autorízase a pesca de ciprínidos durante todo o ano no tramo comprendido entre a parte superior da lagoa do auditorio (límite superior) e á Ponte da Devesa (límite inferior), no concello de Lalín.

-Río Ulla.

No tramo desde a ponte de Catoira ata a ponte da estrada N-550 en Pontecesures, nunha lonxitude aproximada de 10 km, poderase pescar desde embarcacións ou artefactos boiantes.

Do 1 de maio ao 22 de agosto poderase utilizar xorra no tramo comprendido entre a ponte de Catoira e a ponte da estrada N-550 en Pontecesures para a pesca de especies propias de esteiros (robaliza, muxe, anguía, solla etc...).

-Río Oitavén

Autorízase a pesca desde, embarcacións sen motor no encoro das Eiras.

-Río Verdugo.

Aprázase o inicio da tempada ata a data de celebración da Festa Municipal da Troita no tramo de pesca sen morte do couto de Ponte Caldelas. Con motivo desta festa autorízase a celebración dun concurso de pesca neste tramo, coas normas que estableza a entidade organizadora, logo de aprobación do servizo provincial.

AXENCIA DE PROTECCIÓN DA LEGALIDADE URBANÍSTICA

Resolución do 23 de febreiro de 2009 pola que se ordena a publicación do convenio de adhesión á Axencia de Protección da Legalidade Urbanística do Concello de Petín.

O día 13 de febreiro de 2009, a axencia e o Concello de Petín asinaron o convenio de adhesión dese concello á Axencia de Protección da Legalidade Urbanística.

De conformidade co establecido no artigo 9.1º dos estatutos da axencia aprobados polo Decreto 213/2007, do 31 de outubro, dispoño a súa publicación no *Diario Oficial de Galicia*.

Santiago de Compostela, 23 de febreiro de 2009.

Hipólito Pérez Novo
Director da Axencia de Protección da Legalidade Urbanística

CONVENIO DE ADHESIÓN Á AXENCIA DE PROTECCIÓN DA LEGALIDADE URBANÍSTICA

Santiago de Compostela, trece de febreiro de dous mil nove.

Intervenien:

Dunha parte, Miguel Bautista Carballo, alcalde do Concello de Petín, provincia de Ourense, en representación do concello, de conformidade co disposto no artigo 61 da Lei 5/1997, de 22 de xullo, de Administración local de Galicia, e no artigo 21 da Lei 7/1985, do 2 de abril, reguladora das bases de réxime local.

E doutra parte, Hipólito Pérez Novo, director da Axencia de Protección da Legalidade Urbanística, en representación do ente público, de conformidade co disposto no artigo 18 dos estatutos aprobados polo Decreto 213/2007, do 31 de outubro.

Expoñen:

1º A Lei 9/2002, do 30 de decembro, de ordenación urbanística e protección do medio rural de Galicia, modificada pola Lei 15/2004, do 29 de decembro, no seu artigo 226, establece que a Axencia de Protección da Legalidade Urbanística é un ente público de natureza consorcial, dotado de personalidade xurídica, patrimonio e orzamento propios e plena autonomía no cumprimento das súas funcións, para o desenvolvemento en común pola Administración autonómica e os municipios que voluntariamente se integren nela das funcións de inspección, restauración da legalidade e sanción en materia de urbanismo e o desempeño de cantas outras competencias lle asignan os seus estatutos.

Así mesmo, establece que son membros da axencia a Administración autonómica e os municipios que voluntariamente se integren nela. A incorporación dos municipios realizarase a través do correspondente convenio de adhesión, que deberá obter a previa aprobación do Pleno da Corporación e do Consello da Xunta de Galicia e será publicado no *Diario Oficial de Galicia*.

Os estatutos da Axencia de Protección da Legalidade Urbanística foron aprobados por Decreto autonómico 213/2007, do 31 de outubro, e publicados no *Diario Oficial de Galicia* número 222, do 16 de novembro.

2º O Concello de Petín ten atribuídas competencias en materia de disciplina urbanística, en virtude do disposto no artigo 80 da Lei 5/1997, de 22 de xullo, de Administración local de Galicia, no artigo 25 da Lei 7/1985, do 2 de abril, reguladora das bases do réxime local, e nos artigos 209 e seguintes da Lei 9/2002, do 30 de decembro, de ordenación urbanística e protección do medio rural de Galicia.

A Lei 7/1985, do 2 de abril, reguladora das bases de réxime local, no seu artigo 10, determina que a Administración local e as demais administracións públicas axustarán as súas relacións recíprocas aos

deberes de información mutua, colaboración, coordinación e respecto aos ámbitos competenciais respectivos e que procederá á coordinación das competencias das entidades locais entre si e, especialmente, coas das restantes administracións públicas, cando as actividades ou os servizos locais transcendan o interese propio das correspondentes entidades, incidan ou condicionen relevantemente os das devanditas administracións ou sexan concorrentes ou complementarios dos destas.

O texto refundido das disposicións vixentes en materia de réxime local, aprobado polo Decreto legislativo 781/1986, do 18 de abril, no seu artigo 69, establece que as competencias compartidas ou concorrentes poderán ser exercidas conxuntamente pola Administración do Estado ou da comunidade autónoma e a local, mediante a constitución de entes instrumentais de carácter público ou privado.

3º En virtude do establecido nos artigos 222.2º e 226 da Lei 9/2002, do 30 de decembro, de ordenación urbanística e protección do medio rural de Galicia, a axencia exercerá as competencias que lle sexan delegadas polos concellos consorciados.

Neste sentido, o artigo 9 dos estatutos da axencia, aprobados polo Decreto autonómico 213/2007, do 31 de outubro, dispón que a adhesión necesariamente producirá a atribución á axencia das competencias de inspección, supervisión, sanción e restablecemento da legalidade urbanística que correspondan ao municipio integrado voluntariamente na axencia, nos supostos que determinan os artigos 209, 210 e 211 da Lei 9/2002, de ordenación urbanística e protección do medio rural de Galicia, segundo se establece no convenio de adhesión.

4º Este convenio de adhesión obtivo a previa aprobación do Pleno da Corporación municipal de Petín en sesión que tivo lugar o 2 de febreiro de 2009, co voto favorable da maioría absoluta do número legal de membros da Corporación, de conformidade co disposto no 226.2º da Lei 9/2002, de ordenación urbanística e protección do medio rural de Galicia, e no artigo 215.3º da Lei 5/1997, do 22 de xullo, de Administración local de Galicia.

Así mesmo, obtivo a aprobación do Consello da Xunta de Galicia, na súa reunión do 30 de decembro de 2008, de conformidade co disposto no artigo 226.2º da Lei 9/2002, de ordenación urbanística e protección do medio rural de Galicia.

Os intervenientes recoñecen mutua capacidade para o outorgamento deste convenio de adhesión, de conformidade coas seguintes

Estipulacións:

Primeira.-*Incorporación á axencia.*

O Concello de Petín, provincia de Ourense, incorporase e adhírese como membro da Axencia de Protección da Legalidade Urbanística, asumindo os

dereitos e obrigas que disto derivan, de conformidade co estipulado neste convenio de adhesión e o establecido nos estatutos da axencia, aprobados polo Decreto autonómico 213/2007, do 31 de outubro, e na Lei 9/2002, do 30 de decembro, de ordenación urbanística e protección do medio rural de Galicia.

Segunda.-Delegación de competencias.

1. O Concello de Petín delega na Axencia de Protección da Legalidade Urbanística o exercicio das competencias municipais de inspección, supervisión, sanción e restablecemento da legalidade urbanística establecidas nos artigos 209, 210, 211 e 222 da Lei 9/2002, do 30 de decembro, de ordenación urbanística e protección do medio rural de Galicia, en relación coas obras e usos do solo que se executen sen licenza urbanística ou sen axustarse ás súas condicións, sempre que estean situadas nalgún dos seguintes ámbitos:

a) Solo rústico en calquera das súas categorías (artigos 15 e 32 e disposición transitoria primeira, punto 1º f), da Lei 9/2002).

b) Nos núcleos rurais tradicionais (artigo 13 da Lei 9/2002).

c) Solo urbanizable delimitado e non delimitado, mentres non sexa aprobado o correspondente plan parcial ou plan de sectorización (artigo 14 da Lei 9/2002).

A axencia exercerá efectivamente estas competencias desde o día seguinte ao da publicación do convenio no *Diario Oficial de Galicia*.

2. Nesta delegación de competencias non está incluída a reposición da legalidade nin a potestade sancionadora en relación coas obras completamente rematadas antes da publicación deste convenio, que serán exercidas polo concello.

3. A resolución dos recursos administrativos interpostos contra os actos ditados pola axencia en exercicio de competencias delegadas corresponderalle ao concello.

Para resolver o recurso deberá solicitarse informe da Axencia de Protección da Legalidade Urbanística. Cando se reciba o escrito de interposición de recurso na axencia, esta deberá remitirlllo ao concello co seu informe e unha copia completa e ordenada do expediente administrativo.

4. A delegación de competencias poderá ser revogada en calquera momento polo Pleno da Corporación, coa maioría esixida no artigo 215.3º da Lei 5/1997, do 22 de xullo, de Administración local de Galicia. A revogación será efectiva unha vez comunicada á dirección da axencia e publicada no *Diario Oficial de Galicia*.

Terceira.-Contribución ao sostemento da axencia.

1. O Concello de Petín contribuirá ao sostemento da Axencia de Protección da Legalidade Urbanística coas seguintes achegas económicas:

a) O 50% do produto das multas coercitivas impostas pola axencia para a execución das ordes de reposición da legalidade ditadas no exercicio das competencias delegadas polo concello;

b) O 50% do importe das sancións impostas pola axencia aos responsables de infraccións urbanísticas, en exercicio das competencias delegadas polo concello.

2. O importe das multas coercitivas e das sancións impostas pola axencia en exercicio de competencias delegadas polo concello serán ingresadas polos suxeitos obrigados directamente na conta xeral da axencia. No suposto de que non sexan aboadas en período voluntario, a axencia solicitará da Consellería de Economía e Facenda o seu cobramento pola vía de constrinximento.

Ao finalizar cada exercicio anual, a axencia transferirá ao concello de Petín unha cantidade equivalente ao 50% dos ingresos percibidos polas sancións impostas en exercicio das competencias delegadas.

Cuarta.-Obrigas asumidas polo concello.

O Concello de Petín asume as seguintes obrigas:

a) Prestar a cooperación e asistencia activa que a axencia lle solicite para o eficaz exercicio das súas competencias.

b) Facilitarlle ao persoal da axencia o acceso inmediato aos expedientes de planeamento, xestión e disciplina urbanística, así como canta información, documentación e axuda material precise para o adecuado cumprimento das súas funcións.

c) Prestar o auxilio da Policía local para facilitar as inspeccións, executar as ordes de precinto de obras e identificar os responsables de posibles infraccións.

d) Absterse de outorgar licenzas urbanísticas que impliquen a legalización de obras e usos do solo respecto dos que a axencia ordenase a súa demolición, cesamento ou restauración da realidade física alterada.

e) Solicitar informe da axencia previamente á resolución dos recursos administrativos interpostos contra os actos ditados en exercicio das competencias delegadas polo concello.

f) Contribuír ao sostemento económico da axencia nos termos establecidos neste convenio de adhesión.

g) Respetar as estipulacións deste convenio e o establecido nos estatutos da Axencia de Protección da Legalidade Urbanística aprobados polo Decreto autonómico 213/2007, do 31 de outubro.

Quinta.-Programa de incorporación.

A incorporación do concello á axencia será efectiva desde o día seguinte ao de publicación deste convenio no *Diario Oficial de Galicia*.

Os expedientes relativos ás obras en execución nas materias que son obxecto de delegación deberán ser remitidos á Axencia de Protección da Legalidade Urbanística no prazo dun mes desde a data de entrada en vigor deste convenio.

Sexta.-Prazo de vixencia do convenio.

Este convenio entrará en vigor o día seguinte ao da súa publicación no *Diario Oficial de Galicia* e o seu prazo de vixencia será indefinido.

A resolución deste convenio producirase no suposto de que o Concello de Petín perda a condición de membro da axencia por calquera das causas que se establecen no artigo 12 dos estatutos da axencia e cos efectos que o mesmo artigo dispón.

Sétima.-Interpretación do convenio.

As controversias que puidesen xurdir na interpretación deste convenio e a súa aplicación serán resoltas polo Consello Executivo da axencia, de conformidade co disposto no artigo 10 dos estatutos da axencia aprobados polo Decreto 213/2007, do 31 de outubro.

E para que así conste, asinan este convenio de adhesión, por duplicado exemplar, no lugar e data arriba indicados.

AXENCIA GALEGA DAS INDUSTRIAS CULTURAIAS

Corrección de erros.-Resolución do 12 de xaneiro de 2009 pola que se anuncia convocatoria pública de subvencións ás industrias culturais para o ano 2009.

Na devandita resolución publicada no *Diario Oficial de Galicia* número 19, do mércores 28 de xaneiro de 2009, cómpre realizar a seguinte corrección:

-Na páxina 1.849, cláusula 12, letra c), onde di: «Nas subvencións a compañías residentes, os beneficiarios estarán obrigados a realizar, durante o ano 2009, 50 funcións no espazo escénico de residencia», debe dicir: «Nas subvencións a compañías residentes, os beneficiarios estarán obrigados a realizar, durante o ano 2009, as funcións mínimas establecidas na cláusula terceira do capítulo V».

ESCOLA GALEGA DE ADMINISTRACIÓN PÚBLICA

Resolución do 23 de febreiro de 2009 pola que se establecen as bases reguladoras da concesión dos premios da Escola Galega de Administración Pública á calidade de materiais didácticos e se convoca a súa cuarta edición.

A Escola Galega de Administración Pública (en diante EGAP), como órgano encargado da formación do persoal ao servizo das administracións públicas de Galicia e da investigación en todas as materias que sexan do seu interese, así como tamén, de ser o caso, doutras administracións de Galicia, considera o fomento e a promoción da investigación e da innovación educativa como principios de calidade da formación. Por tanto, considera necesario promover procesos de investigación que xeren materiais didácticos para o seu emprego e que sirvan, mediante a súa difusión, como apoio á mellora da práctica docente.

O plan de actividades da EGAP para 2009, aprobado polo Consello Reitor da escola, recolle a convocatoria dun premio á calidade de materiais didácticos. Este premio ten por finalidade fomentar a calidade do deseño e do contido de materiais didácticos de acordo cos criterios da sinxeleza no uso, a accesibilidade, a compatibilidade e a estruturación axeitada dos contidos, de maneira que se compatibilice a optimización da información coa minimización de recursos, a calidade estética dos materiais e a adecuación dos contidos aos obxectivos pedagóxicos e ás necesidades formativas do persoal ao servizo das administracións públicas de Galicia, incorporando instrumentos para a autoavaliación no proceso de aprendizaxe por parte do alumnado.

Polo exposto anteriormente,

DISPOÑO:

Aprobar as bases reguladoras da concesión, en réxime de concorrencia competitiva, dos premios á calidade de materiais didácticos e convocar a súa cuarta edición conforme as seguintes bases:

Primeiro.-Obxectivo.

Os premios á calidade dos materiais didácticos están destinados a distinguir os mellores materiais didácticos no eido da formación do persoal ao servizo das administracións públicas de Galicia, en calquera soporte impreso ou dixital. Non entrará nesta convocatoria aquel material especificamente dirixido a persoal sanitario e/ou docente.

Segundo.-Premios.

Os premios outorgaranse en tres categorías:

-Primeiro premio: dotado con 4.000 €.

-Segundo premio: dotado con 2.000 €.

-Dous terceiros premios: dotados con 1.000 € (nesse caso poderá haber dúas candidaturas premiadas e outorgaráselles 1.000 € a cada unha delas).